

摘藻堂四庫全書薈要

集部

欽定四庫全書薈要

集部

御選宋詩卷二十八

九

詳校官原任主事臣李斯咏

欽定四庫全書薈要卷一萬八千三百三十五

具部

御選宋詩卷二十八

七言古詩四

蘇軾

春菜

蔓菁宿根已生葉
韭牙戴土拳如蕨
爛蒸香薺白魚肥
碎點青蒿涼餅滑
宿酒初消春睡起
細履幽畦掇芳辣
茵陳甘菊不負渠
鱠縷堆盤纖手抹
北方苦寒今未已



雪底菠薐如鐵甲
豈如吾蜀富冬蔬
霜葉露芽寒更茁
久拋菘葛猶細事
苦筍江豚那忍說
明年投劾徑須歸
莫待齒搖并髮脫

送孔郎中赴陝郊

驚風擊面黃沙走
西出嶠函脫塵垢
使君來自古徐州
聲震河潼殷關右
十里長亭聞鼓角
一川秀色明花柳
北臨飛檻卷黃流
南望青山如峴首
東風吹開錦繡谷
淥水翻動蒲萄酒
訟庭生草數開尊
過客如雲牢閉口

與梁左藏會飲傅國博家

將軍破賊自草檄論詩說劍俱第一彭城老守本虛名
識字劣能欺項籍風流別駕貴公子欲把笙歌暖鋒鏑
紅旆朝開猛士譟翠帷暮捲佳人出東堂醉臥呼不起
啼鳥落花春寂寂試教長笛傍耳根一聲吹裂堦前石

次韻答劉涇

吟詩莫作秋蟲聲天公怪汝鉤物情使汝未老華髮生
芝蘭得雨蔚青青何由自燔以出馨細書千紙雜真行

新音百變口如鷲異義逢起弟子爭舌翻濤瀾卷齊城

萬卷堆胸兀相撐以病為樂子未經我有至味非煎烹
是中之樂吁難名綠槐如山閤廣庭飛蟲繞耳細而清
敗席輾轉臥見驚亦不自嫌翠織成意行信足無溝坑
不識五郎呼作卿吏民哀我老不明相戒無復煩鞭刑
時臨泗水照星星微風不起鏡面平安得一舟如葉輕
臥聞郵籤報水程尊羹羊酪不須評一飽且救饑腸鳴

次韻答舒教授觀余所藏墨

異時長笑王會稽野鶩齷齪汚刀几暮年却得庾安西
自厭家雞題六紙二子風流冠當代顧與兒童爭愠喜
秦王十八已龍飛嗜好晚將蛇蚓比我生百事不挂眼
時人謬說云工此世間有癖念誰無傾身障麓尤堪鄙
一生當著幾兩屐定心肯為微物起此墨足支三十年
但恐風霜侵髮齒非人磨墨磨人鉗應未罄壘先耻
逝將振衣歸故國數畝荒園自鉏理作書寄君君莫笑
但覓來禽與青李一螺點漆便有餘萬竈燒松何處使

君不見永寧第中擣麝麝列屋閒居清且美倒暈連眉
秀嶺浮雙鴉畫鬢香雲委時聞五斛賜蛾綠不惜千金
求獺髓聞君此詩當大笑寒窗冷硯冰生水

芙蓉城

并引

世傳王迴子高與仙人周瑤英遊芙蓉城元豐元
年三月余始識子高問之信然乃作此詩極其情
而歸之正亦變風止乎禮義之意也

芙蓉城中花冥冥誰其主者石與丁珠簾玉按翡翠屏

雲舒霞卷千傳停中有一人長眉青烟如微雲澹疎星
往來三世空鍊形竟坐誤讀黃庭經天門夜開飛爽靈
無復白日乘雲輶俗緣千劫磨不盡翠被冷落淒餘馨
因過緱山朝帝廷夜聞笙簫弭節聽飄然而來誰使令
皎如明月入窗櫺忽然而去不可執寒衾虛幌風泠泠
仙宮洞房本不局夢中同躡鳳凰翎徑度萬里如奔霆
玉樓浮空聳亭亭天書雲篆誰所銘遶樓飛步高矜嶷
仙風鏘然韻流鈴遽遽形開如醉醒芳卿寄謝空丁寧

卷二十八
一朝覆水不返，併羅巾別淚空。熒熒春風，花開秋葉零。
世間羅綺空紛紛，此身流浪隨滄溟。偶然相值兩浮萍。
願君收視觀三庭，勿與嘉穀生蝗螟。從渠一念三千齡，
不作人間尹與邢。

九日黃樓作

去年重陽不可說，南城夜半千漚發。水穿城下作雷鳴，
泥滿城頭飛雨滑。黃花白酒無人問，日暮歸來洗鞞鞢。
豈知還復有今年，把盞對花容一呷。莫嫌酒薄紅粉陋，

終勝泥中千柄錘黃樓新成壁未乾青荷已落霜初殺
朝來白露細如雨南山不見千尋刹樓前便作海茫茫
樓下空聞櫓鴉軋薄寒中人老可畏熱酒澆腸氣先壓
煙消日出見漁邨遠水鱗鱗山齧齧詩人猛士雜龍虎
楚舞吳歌亂鵝鴨一杯相屬君勿辭此境何殊泛清嘗
次韻僧潛見贈

道人胸中水鏡清萬象起滅無逃形獨依古寺種秋菊
要伴騷人餐落英人間底處有南北紛紛鴻鴈何曾冥

閉門坐穴一禪榻頭上歲月空崢嶸今年偶出為求法
欲與慧劍加礮斫雲衲新磨山水出霜髭不剪兒童驚
公侯欲識不可得故知倚市無傾城秋風吹夢過淮水
想見橘柚垂空庭故人各在天一角相望落落如晨星
彭城老守何足顧棗林桑野相邀迎千山不憚荒店遠
兩脚欲趁飛猿輕多生綺語磨不盡尚有婉轉詩人情
猿吟鶴唳本無意不知下有行人行空堦夜雨自清絕
誰使掩抑啼孤惻我欲仙山掇瑤草傾筐坐歎何時盈

簿書鞭撲晝填委煮茗燒栗宜宵征乞取摩尼照濁水
共看落月金盃傾

定惠院寓居月夜偶出

幽人無事不出門偶逐東風轉良夜參差玉宇飛木末
繚繞香煙來月下江雲有態清自媚竹露無聲浩如瀉
已驚弱柳萬絲垂尚有殘梅一枝亞清詩獨吟還自和
白酒已盡誰能借不辭青春忽忽過但恐歡意年年謝
自知醉耳愛松風會揀霜林結茅舍浮浮大甌長炊玉

溜溜小槽如壓蔗飲中真味老更濃醉裏狂言醒可怕
但當謝客對妻子倒冠落珮從嘲罵

次韻前篇

去年花落徐州對月酣歌美清夜今年黃州見花發
小院閉門風露下萬事如花不可期餘年似酒那禁瀉
憶昔扁舟泝巴峽落帆樊口高桅亞長江滾滾空自流
白髮紛紛寧少借竟無五畝繼沮溺空有千篇凌鮑謝
至今歸計負雲山未免孤衾眠客舍少年辛苦真食蓼

老境清閒如啖蔗饑寒未至且安居憂患已空猶夢怕
穿花踏月飲邨酒免使醉歸官長罵

安國寺尋春

臥聞百舌呼春風起尋花柳邨邨同城南古寺修竹合
小房曲檻欹深紅看花歎老憶年少對酒思家愁老翁
病眼不差雲母亂鬢絲強理茶煙中遙知二月王城外
玉仙洪福花如海薄羅勻霧蓋新妝快馬爭風鳴雜珮
玉川先生真可憐一生耽酒終無錢病過三春九十日

獨抱添丁看花發

寓居定惠院之東雜花滿山有海棠一枝土人不知貴也

江城地瘴蕃草木只有名花苦幽獨嫣然一笑竹籬間
桃李漫山總麤俗也知造物有深意故遣佳人在空谷
自然富貴出天姿不待金盤薦華屋朱唇得酒暈生臉
翠袖卷紗紅映肉林深霧暗曉光遲日暖風輕春睡足
雨中有淚亦悽愴月下無人更清淑先生食飽無一事

散步逍遙自捫腹不問人家與僧舍拄杖敲門看修竹
忽逢絕豔照衰朽歎息無言揩病目陋邦何處得此花
無乃好事移西蜀寸根千里不易到銜子飛來定鴻鵠
天涯流落俱可念為飲一尊歌此曲明朝醉醒還獨來
雪落紛紛那忍觸

過江夜行武昌山上聞黃州鼓角

清風弄水月銜山幽人夜渡吳王峴黃州鼓角亦多情
送我南來不辭遠江南又聞出塞曲半雜江聲作悲健

誰言萬方聲一概。鼉憤龍愁為余變。我記江邊枯柳樹。
未死相逢真識面。他年一葉沂江來。還吹此曲相迎餞。
自興國往筠宿石田驛南二十五里野人舍

溪上青山三百疊。快馬輕衫來一抹。倚山修竹有人家。
橫道清泉知我渴。芒屨竹杖自輕軟。蒲薦松牀亦香滑。
夜深風露滿中庭。惟有孤螢自開闔。

蔡景繁官舍小閣

使君不獨東南美。典刑尚記先君子。戲朝王叟短轅車。

肯為徐郎書紙尾三年弭節江湖上千首放懷風月裏
手開東閣坐虛明目淨東谿照清泚素琴濁酒容一榻
落霞孤鶩供千里大舫何時繫門柳小詩屢欲書窗紙
文昌新構滿鵷鷺都邑正喧收杞梓相逢一醉豈有命
南來寂寞君歸矣

次韻王定國南遷回見寄

土暈銅花蝕秋水要須悍石相礮砥十年冰蘖戰膏梁
萬里煙波濯紈綺歸來詩思轉清激百丈空潭數魴鯉

逝將桂浦擷蘭蓀不記槐堂收劔履却思庾嶺今何在
更說彭城真夢耳君知先竭是甘泉我願得全如苦李
妄心不復九迴腸至道終當三洗髓廣陵陽羨何足較
只有無何真吾里樂全老子今禪伯掣電機鋒不容擬
心通豈復問云何印可聊須答如是相逢為我話留滯
桃花春漲孤舟起

寄蘄箏與蒲傳正

蘭谿美箭不成笛離離玉筋排霜脊千溝萬縷自生風

入手未開先慘慄公家列屋閒蛾眉珠簾不動花陰移
霧帳銀牀初破睡牙籤玉局坐彈棋東坡病叟長羈旅
凍臥饑吟似饑鼠倚賴春風洗破衾一夜雪寒披故絮
火冷燈青誰復知孤舟兒女自憂伊皇天何時反炎燠
愧此八尺黃琉璃願君淨掃清香閣臥聽風漪聲滿榻
習習還從兩腋生請公乘此朝闔闔

觀杭州鈴轄歐育刀劔戰袍

青綾袖衫暖襯甲紅線勒帛光遶脅禿襟小袖鵬鷲盤

大刀長劔龍蛇桺兩軍鼓譟屋瓦墜紅塵白羽紛相雜
將軍恩重此身輕笑履鋒鏑如一插書生只肯坐帷幄
談笑毫端弄生殺叫呼擊鼓催上竿猛士應憐小兒黠
試問黃河夜偷渡掠面驚沙寒霎霎何如大艦日高眠
一枕清風過苔雲

寄吳德仁兼簡陳季常

東坡先生無一錢十年家火燒凡鉛黃金可成河可塞
只有霜鬢無由元龍丘居士亦可憐談空說有夜不眠

忽聞河東獅子吼拄杖落手心茫然誰似濮陽公子賢
飲酒食肉自得仙平生寓物不留物在家學得忘家禪
門前穉稬十頃田清溪繞屋花連天溪堂醉臥呼不醒
落花如雪春風顛我遊蘭谿訪清泉已辦布襪青行纏
稽山不是無賀老我自興盡回酒船恨君不識顏平原
恨我不識元魯山銅駝陌上會相見握手一笑三千年

送楊傑

并序

無為子嘗奉使登太山絕頂雞一鳴見日出又嘗

以事過華山重九日飲酒蓮華峰上今乃奉詔與
高麗僧統游錢塘皆以王事而從方外之樂善哉
未曾有也作是詩以送之

天門夜上賓出日萬里紅波半天赤歸來平地看跳丸
一點黃金鑄秋橘太華峰頭作重九天風吹灑黃花酒
浩歌馳下腰帶鞆醉舞奔崖一揮手神游八極萬緣虛
下視蚊雷隱汚渠大千一息八十返笑厲東海騎鯨魚
三韓王子西求法鑿齒彌天兩勅敵過江風急浪如山

寄語舟人好看客

再過超然臺贈太守霍翔

昔飲雩泉別常山天寒歲在龍蛇間山中兒童拍手笑
問我西去何當還十年不赴竹馬約扁舟獨與漁蓑閒
重來父老喜我在扶挈老幼相遮攀當時襁褓皆七尺
而我安得留朱顏問今太守為誰歟護羌充國鬪未斑
躬持牛酒勞行役無復杞菊朝寒慳超然置酒尋舊迹
尚有詩賦鏡堅頑孤雲落日在馬耳照耀金碧開煙鬟

卻淇自古北流水跳波下瀨鳴玦環願公談笑作石埭
坐使城郭生溪灣

海市

并引

予聞登州海市舊矣父老云常出於春夏今歲晚
不復見矣予到官五日而去以不見為恨禱於海
神廣德王之廟明日見焉乃作此詩

東方雲海空復空羣仙出沒空明中蕩搖浮世生萬象
豈有貝闕藏珠宮心知所見皆幻影敢以耳目煩神工

歲寒水冷天地閉為我啟螯鞭魚龍重樓翠阜出霜曉
異事驚倒百歲翁人間所得容力取世外無物誰為雄
率然有請不我拒信我人厄非天窮潮陽太守南遷歸
喜見石廩堆祝融自言正直動山鬼豈知造物哀龍鍾
信眉一笑豈易得神之報汝亦已豐斜陽萬里孤鳥沒
但見碧海磨青銅新詩綺語亦安用相與變滅隨東風

送戴蒙赴成都玉局觀將老馬

拾遺被酒行歌處野梅官柳西郊路聞道華陽版籍中

至今尚有城南杜我欲歸尋萬里橋水花風葉暮瀟瀟
芋魁徑尺誰能盡椴木三年已足燒百歲風狂定何有
羨君今作峨眉叟縱未家生執戟郎也應世出埋輪守
莫欺老病未歸身玉局他年第幾人會待子猷清興發
還須雪夜去尋君

送陳睦知潭州

華清縹緲浮高棟上有緜林藏石壘一杯此地初識君
千巖夜上同飛鞚君時年少面如玉一飲百觚嫌未痛

白鹿泉頭山月出寒光潑眼如流汞朝元閣上酒醒時
臥聽風鸞驚鐵鳳舊遊空在人何處二十三年真一夢
我得生還雪髯滿君亦老嫌金帶重有如社燕與秋鴻
相逢未穩還相送洞庭青草渺無際天柱紫蓋森欲動
湖南萬古一長嗟付與騷人發嘲弄

送表弟程六知楚州

炯炯明珠照雙璧當年三老蘇程石里人下道避鳩杖
刺史迎門倒鳧鳥我時與子皆兒童狂走從人覓梨栗

健如黃犢不可恃隙過白駒那暇惜醴泉寺古垂橘柚
石頭山高暗松櫟諸孫相逢萬里外一笑未解千憂集
子方得郡古山陽老手生風謝刀筆我正含毫紫微閣
病眼昏花困書檄莫教印綬繫餘年去掃墳墓當有日
功成頭白早歸來共藉梨花作寒食

武昌西山并引

嘉祐中翰林學士承旨鄧公聖求為武昌令常游
寒溪西山中人至今能言之軾謫居黃岡與武

昌相望亦常往來谿山間元祐元年十一月二十
九日考試館職與聖求會宿玉堂偶話舊事聖求
嘗作元次山窪樽銘刻之巖石因為此詩請聖求
同賦當以遺邑人使刻之銘側

春江綠漲蒲萄醅武昌官柳知誰栽憶從樊口載春酒
步上西山尋野梅西山一上十五里風駕兩腋飛崔嵬
同游困臥九曲嶺褰衣獨到吳王臺中原北望在何許
但見落日低黃埃歸來解劔亭前路蒼崖半入雲濤堆

浪翁醉處今尚在石臼杯飲無樽罍爾來古意誰復嗣
公有妙語留山隈至今好事除草棘常恐野火燒蒼苔
當時相望不可見玉堂正對金鑿開豈知白首同夜直
臥看椽燭高花摧江邊曉夢忽驚斷銅鑲玉鎖鳴春雷
山人帳空猿鶴怨江湖水生鴻鴈來請公作詩寄父老
往和萬壑松風哀

再用前韻

朱顏發過如春醅胸中梨棗初未栽丹砂未易掃白髮

赤松却欲參黃梅寒溪本自遠公社白蓮翠竹依崔嵬
當時石泉照金像神光夜發如五臺飲泉鑒面得真意
坐視萬物皆浮埃欲收暮景返田里遠汧江水窮離堆
還朝豈獨羞老病自歎才盡傾空壘諸公渠渠若夏屋
吞吐風月清隅隈我如廢井久不食古甃缺落生陰苔
數詩往復相感發汲新除舊寒光開遙知二月春江濶
雪浪倒卷雲峰摧石中無聲水亦靜云何解轉空山雷

韋應物詩云水性本云靜石中固
無聲如何兩相激雷轉空山驚

欲就諸公評此語要

識憂喜何從來願求南宗一勺水往與屈賈湔餘哀

趙令宴崔白大圖幅徑三丈

扶桑大繭如壑蓋天女織綃雲漢上往來不遣鳳銜梭
誰能鼓臂投三丈人間刀尺不敢裁丹青付與濠梁崔
風蒲半折寒雁起竹間的磔寒江梅畫堂粉壁翻雲幕
十里江天無處著好臥元龍百尺樓笑看江水拍天流

郭熙畫秋山平遠

文潞公
為跋尾

玉堂晝掩春日閒中有郭熙畫春山鳴鳩乳燕初睡起

白波青嶂非人間
離離短幅開平遠
漠漠疎林寄秋晚
却似江南送客時
中流回頭望雲巘
伊川佚老鬢如霜
臥看秋山思洛陽
為君紙尾作行草
炯如嵩洛浮秋光
我從公遊如一日
不覺青山映黃髮
為畫龍門八節灘
待向伊川買泉石

贈李道士 并序

駕部員外郎李宗君固景祐中良吏也守漢州有
道士尹可元精練善畫以遺火得罪當死君緩其

獄會赦獲免時可元八十一自誓且死必為李氏
子以報可元既死二十餘年而君子世昌之婦夢
可元入其室生子曰得柔小名蜀孫幼而善畫既
長讀莊老喜之遂為道士賜號妙應事母以孝謹
聞其寫真蓋妙絕一時云

世人只數曹將軍誰知虎頭非癡人腰間大羽何足道
頰上三毫自有神平生狎侮諸公子戲著幼輿巖石裏
故教世世作黃冠布襪青鞋弄雲水千年鼻祖守關門

一念還為李耳孫香火舊緣何日盡丹青餘習至今存
五十之年初過二衰顏記我今如此他時要指集賢人
知是香山老居士

余與李廌方叔相知久矣領貢舉事而李不得
第愧甚作詩送之

與君相從非一日筆勢翩翩疑可識平生謾說古戰場
過眼終迷日五色我慙不出君大笑行止皆天子何責
青袍白紵五千人知子無怨亦無德買羊沽酒謝玉川

為我醉倒春風前歸家但草凌雲賦我相夫子非臞仙
慶源宣義王丈以累舉得官為洪雅主簿雅州
戶掾遇吏民如家人人安樂之既謝事居眉之
青神瑞草橋放懷自得有書來求紅帶既以遺
之且作詩為戲請黃魯直秦少游各為賦一首
為老人光華

青衫半作霜葉枯遇民如兒吏如奴吏民莫作官長看
我是識字耕田夫妻啼兒號刺史怒時有野人來挽須

拂衣自注下下考芋魁飯豆吾豈無歸來瑞草橋邊路
獨游還佩平生壺慈姥巖前自喚渡青衣江畔人爭扶
今年蠶市數州集中有遺民懷袴襦邑中之黔相指似
白鬚紅帶老不癯我欲西歸卜鄰舍隔牆拊掌容歌呼
不學山王乘駟馬回頭空指黃公壚

書王定國所藏煙江疊嶂圖

江上愁心千疊山浮空積翠如雲煙山邪雲邪遠莫知
煙空雲散山依然但見兩崖蒼蒼暗絕谷中有百道飛

來泉縈林絡石隱復見下赴谷口為奔川川平山開林
麓斷小橋野店依山前行入稍度喬木外漁舟一葉江
吞天使君何從得此本點綴毫末分清妍不知人間何
處有此境徑欲往買二頃田君不見武昌樊口幽絕處
東坡先生留五年春風搖江天漠漠暮雲卷雨山娟娟
丹楓翻鴉伴水宿長松落雪驚醉眠桃花流水在人世
武陵豈必皆神仙江山清空我塵土雖有去路尋無緣
還君此畫三歎息山中故人應有招我歸來篇

東川清絲寄魯冀州戲贈

鵝溪清絲清如冰
上有千歲交枝藤
藤生谷底飽風雪
歲晚忽作龍蛇升
嗟我雖為老侍從
骨寒只受布與繒
牀頭錦衾未還客
坐覺芒刺在背膺
豈如髯卿晚乃貴
福祿正似川方增
醉中倒著紫綺裘
下有半臂出縹綾
封題不敢妄裁剪
刀尺自有佳人能
遙知千騎出清曉
積雪未放浮塵興
白須紅帶柳絲下
老弱空巷人相登
但放竒紋出領袖
吾髯雖老無人憎

寄蔡子華

故人送我東來時，手栽荔子待我歸。
荔子已丹吾髮白，猶作江南未歸客。
江南春盡水如天，腸斷西湖春水船。
想見青衣江畔路，白魚紫笋不論錢。
霜髯三老如霜檜，舊交零落今誰輩。
莫從唐舉問封侯，但遣麻姑更爬背。
送江公著知吉州

三吳行盡千山水，猶道桐廬更清美。
豈惟濁世隱狂奴，時平亦出佳公子。
初冠惠文讀城旦，晚入奉常陪劔履。

方將華省起彈冠，忽憶釣臺歸洗耳。未應良木棄大匠，要使名駒試千里。奉親官舍當有擇，得郡江南差可喜。白粲連檣一萬艘，紅妝執樂三千指。簿書期會得餘閒，亦念人生行樂耳。

次韻曹子方運判雪中同遊西湖

詞源濫濫波頭展，清唱一聲巖谷滿。未容雪積句先高，豈獨湖開心自遠。雲山已作歌看淺，山下碧流清似眼。尊前侑酒只新詩，何異書魚餐蠹簡。

西湖秋酒東池魚窘甚因會客呼網師遷之西
池為一笑之樂夜歸被酒不能寐戲作放魚一
首

東池浮萍半黏塊裂碧跳青出魚背西池秋水尚涵空
舞濶搖深吹荇帶吾僚有意為遷居老守縱饒那忍膾
縱橫爭看銀刀出澆滷初驚玉花碎但愁數咎損鱗鬣
未信長堤隔濤瀨濺濺發發須臾間圍圍洋洋尋丈外
安知中無蛟龍種尚恐或有風雲會明年春水漲西湖

好去相忘渺淮海

復次放魚韻答趙承議陳教授

擾擾萬生同一塊
搶榆不羨培風背
青丘已吞雲夢芥
黃河復繚天門帶
長譏韓子隘且陋
一飽鯨魚何足膾
東坡也是可憐人
披抉泥沙收細碎
逝將歸休八節灘
又欲往釣七里瀨
正似此魚逃網中
未與造物遊數外
且將新句調二子
湖上秋高風月會
為君更喚木腸兒
脚扣兩舷歌小海

聚星堂雪

并引

元祐六年十一月一日禱雨張龍公得小雪與客
會飲聚星堂忽憶歐陽文忠公作守時雪中約客
賦詩禁體物語於艱難中特出奇麗爾來四十餘
年莫有繼者僕以老門生繼公後雖不足追配先
生而賓客之美殆不減當時公之二子又適在郡
故輒舉前令各賦一篇以為汝南故事云

窗前暗響鳴枯葉龍公試手行初雪映空先集疑有無

作態斜飛正愁絕衆賓起舞風竹亂老守先醉霜松折
恨無翠袖點橫斜祇有微燈照明滅歸來尚喜更鼓永
晨起不待鈴索掣未嫌長夜作衣稜却怕初陽生眼纈
欲浮大白追餘賞幸有回飈驚落屑糝糊檜頂獨多時
歷亂瓦溝裁一瞥汝南先賢有故事醉翁詩話誰續說
當時號令君聽取白戰不許持寸鐵

用前韻作雪詩留景文

萬松嶺上黃千葉載酒年年踏松雪劉郎去後誰復來

花下有人心斷絕東齋夜坐搜雪句兩手龜折霜須折
無情豈亦畏嘲弄穿簾入戶吹燈滅紛紛兒女爭所似
碧海長鯨君未掣朝來雲漢接天流顧我小詩如點纈
歐陽趙陳在戶外急掃中庭鋪木屑交遊雖似雪栢堅
聚散行作風花瞥晴光融作一尺泥歸有何事真無說
泥乾路穩放君去莫倚馬蹄如踏鐵

送李公恕赴闕

君才有如切玉刀見之凜凜寒生毛願隨壯士斬蛟蜃

不願腰間纏錦條，用違其才志不展。坐與胥吏同疲勞，
忽然眉上有黃氣。吾君漸次收英髦，立談左右俱動色。
一語徑破千言牢，我頃分符在東武。脫略萬事惟嬉遨，
盡壞屏障通內外。仍呼騎曹為馬曹，君為使者見不問。
反更對飲持雙螯，酒酣箕坐語驚衆。雜以嘲諷窮詩騷，
世上小兒多忌諱。獨能容我真賢豪，為我買田臨汝水。
逝將歸去誅蓬蒿，安能終老塵土下。俯仰隨人如桔槔。

蠟梅一首贈趙景貺

天工點酥作梅花此有蠟梅禪老家蜜蜂採花作黃蠟
取蠟為花亦其物天工變化誰得知我亦兒嬉作小詩
君不見萬松嶺上黃千葉玉蘂檀心兩竒絕醉中不覺
渡千山夜聞梅香失醉眠歸來却夢尋花去夢裏花仙
覓竒句此間風物屬詩人我老不飲當付君君行適吳
我適越笑指西湖作衣鉢

次韻王滁州見寄

斯人何似似春雨歌舞農夫怨行路君看永叔與元之

坎軻一生遭口語兩老當年鬢未絲玉堂揮翰手如飛
教得滁人解吟咏至今里巷嘲輕肥君家聯翩盡卿相
獨來坐嘯谿山上笑捐浮利一雞肋多取清名幾熊掌
丈夫自重貴難售兩翁今與青山久後來太守更風流
要伴前人作詩瘦我倦承明苦求出到處遺踪尋六一
憑君試與問瑯琊許我來遊莫難色

在潁州與趙德麟同治西湖未成改揚州三月
十六日湖成德麟有詩見懷次其韻

太山秋毫兩無窮巨細本出相形中大千起滅一塵裏
未覺杭穎誰雌雄我在錢塘拓湖淥大堤士女爭昌丰
六橋橫絕天漢上北山始與南屏通忽驚二十五萬丈
老葑席捲蒼雲空竭來穎尾弄秋色一水縈帶昭靈宮
坐思吳越不可到借君月斧修腫朧二十四橋亦何有
換此十頃玻璃風雷塘水乾禾黍滿寶釵耕出餘鸞龍
明年詩客來弔古伴我霜夜號秋蟲

德麟見約來揚寄
居亦有意求揚倅

召還至都門先寄子由

老身倦馬河堤永踏盡黃榆綠槐影荒雞號月未三更
客夢還家時一頃歸老江湖無歲月未填溝壑猶朝請
黃門殿中春事罷詔許來迎先出省已飛青蓋在河梁
定餉黃封兼賜茗遠來無物可相贈一味豐年說淮潁

書晁說之考牧圖後

我昔在田間但知羊與牛川平牛背穩如駕百斛舟舟
行無人岸自移我臥讀書牛不知前有百尾羊聽我鞭
聲如鼓擊我鞭不妄發視其後者而鞭之澤中草木長

草長病牛羊尋山跨坑谷騰趨筋骨強煙蓑雨笠長林
下老去而今空見畫世間馬耳射東風悔不長作多牛
翁

送曾仲錫通判如京師

邊城歲暮多風雪強壓春醪與君別玉帳夜談霜月苦
鐵騎曉出冰河裂斷蓬飛葉卷黃沙祇有千林鬢鬆花
應為王孫朝上國珠幢玉節與排衙左援公孝右孟博
我居其間嘯且諾僕夫為我催歸來要與北海春水爭

先回

寓居合江樓

海上蔥朧氣佳哉二江合處朱樓開蓬萊方丈應不遠
肯為蘇子浮江來江風初涼睡正美樓上啼鴉呼我起
我今身世兩相違西流白日東流水樓中老人日清新
天上豈有癡仙人三山咫尺不歸去一杯付與羅浮春

十一月二十六日松風亭下梅花盛開

春風嶺上淮南邨昔年梅花曾斷魂豈知流落復相見

蠻風蚤雨愁黃昏長條半落荔枝浦臥樹獨秀枕柳園
豈惟幽光留夜色直恐冷豔排冬溫松風亭下荆棘裏
兩株玉蘂明朝暎海南仙雲嬌隋砌月下縞衣來叩門
酒醒夢覺起繞樹妙意有在終無言先生獨飲勿歎息
幸有落月窺清尊

再用前韻

羅浮山下梅花邨玉雪為骨冰為魂紛紛初疑月掛樹
耿耿獨與參橫昏先生索居江海上悄如病鶴栖荒園

天香國豔肯相顧
知我酒熟詩清溫
蓬萊宮中花鳥使
綠衣倒挂扶桑暎
抱叢窺我方醉卧
故遣啄木先敲門
麻姑過君急掃灑
烏能歌舞花能言
酒醒人散山寂寂
唯有落蕊粘空尊

追餞正輔表兄至博羅賦詩為別

孤臣南游隋黃管
君亦何事來牧蠻
艤舟蜚戶龍岡窟
置酒椰葉枕榔間
高談已笑衰語陋
傑句尤覺清詩孱
博羅小縣僧舍古
我不忍去君忘還
君應回望秦與楚

夢涉漢水愁秦關我亦坐念高安客神遊黃蘗參洞山
何時曠蕩洗瑕謫與君歸駕相追攀梨花寒食隔江路
兩山遙對雙煙鬢歸耕不用一錢物惟要兩腳飛屣顏
玉牀丹鏃記分我助我金鼎光爛斑

再用前韻

樂天雙鬢如霜管始知謝遣素與蠻我兄綠髮蔚如故
已了夢幻齊人間蛾眉勸酒聊爾耳處仲太忍茂弘孱
三杯徑醉便歸臥海上知復幾往還連娟六么趁蹋鞠

杳眇三疊縈陽關酒醒夢斷何所有落花流水空青山
忽驚鏡鼓發半夜明月不許幽人攀贈行無物惟一語
莫遣瘴霧侵雲鬢羅浮道人一傾蓋欲繫白日留君顏
應知我是香案吏他年許綴蓬萊班

四月十一日初食荔支

南邨諸楊北邨盧

謂楊梅
盧橘也

白華青葉冬不枯垂黃綴紫

煙雨裏特與荔支為先驅海山仙人絳羅襦紅紗中單
白玉膚不須更待妃子笑風骨自是傾城姝不知天公

有意無遣此尤物生海隅雲山得伴松檜老霜雪自困
檣梨麤先生洗盞酌桂醕冰盤薦此頽虬珠似聞江鯨
斫玉柱更洗河豚烹腹腴予嘗謂荔枝厚味高格兩絕
果中無比惟江鯨柱河豚魚
耳近之我生涉世本為口一官久已輕尊鱸人間何者非
夢幻南來萬里真良圖

同正輔表兄游白水山

偉哉造物真豪縱攫土搏沙為此弄擘開翠峽走雲雷
截破奔流作潭洞因隨化人履巨迹得與仙兄躡飛鞚

曳杖不知巖谷深穿雲但覺衣裘重坐看鷺鳥救霜葉
知有老蛟蟠石甕金沙玉礫粲可數古鏡寶奩寒不動
念兄獨立與世疎絕境難到惟我共永辭角上兩蠻觸
一洗胸中九雲夢浮來山高回望失武陵路絕無人送
筠籃擷翠爪甲香素綆分碧銀瓶凍歸路霏霏湯谷暗
野堂活活神泉湧解衣浴此無垢人身輕可試雲間鳳
次韻正輔同遊白水山

祇知楚越為天涯不知肝膽非一家此身如綫自縈繞

左旋右轉隨縲車誤拋山林入朝市平地咫尺千褒斜
欲從稚川隱羅浮先與靈運開永嘉首參虞舜欵韶石
次謁六祖登南華仙山一見五色羽雪樹兩摘南枝花
赤魚白蟹箸屢下黃柑綠橘籩常加糖霜不待蜀客寄
荔枝莫信閩人誇恣傾白蜜收五稜細劖黃土栽三桠
朱明洞裏得靈草翩然放杖凌蒼霞豈無軒車駕熟鹿
亦有鼓吹號寒鼃仙人勸酒不用勺石上自有樽壘窪
徑從此路朝玉闕千里莫遣毫釐差故人日夜望我歸

相迎直到長風沙豈知乘槎天女側獨倚雲機看織紗
世間誰似老兄弟篤愛不復相疵瑕相攜行到水窮處
庶幾一見留子嗟千年枸杞嘗夜吠無數草棘工藏遮
但令凡心一洗濯神人仙藥不我遐山中歸來萬想滅
豈復回顧雙飛鴉

張競辰永康所居萬卷堂

君家四壁如相如卷藏天祿吞石渠豈惟鄴侯三萬軸
家有世南行祕書兒童拍手笑何事笑人空腹談經義

未許中郎得異書且與揚雄說奇字清江縈出碧玉環
下有老龍千古閒知君好事家有酒化為老人夜扣關
留侯之孫書滿腹玉函寶方何用讀濠梁空復五車多
圯上從來一編足

送別

鴨頭春水濃如染水面桃花弄春臉衰翁送客水邊行
沙襯馬蹄烏帽點昂頭問客幾時歸客道秋風落葉飛
繫馬綠楊開口笑傍人依約見斜暉

再過泗上

眼明初見淮南樹十客相逢九吳語
旅程已付夜帆風
客睡不妨背船雨黃柑紫蟹見江梅
紅稻白魚飽兒女
慇懃買酒謝船師千里勞君勤轉櫓

清遠舟中寄耘老

小寒初度梅花嶺萬壑千巖背人境
清遠聊為泛宅行
一夢分明隨鄉井覺來滿眼是湖山
鴨綠波搖鳳凰影
海陵居士無雲梯歲晚結廬潁水湄
山腰自懸蒼玉珮

野馬不受黃金羈門前車蓋獵獵走笑倚清流數騎絲
汀州相見春風起白蘋吹花散烟水萬里飄蓬未得歸
目斷滄浪淚如洗北鴈南來遺素書苦言大浸沒我廬
清齋十日不燃鼎曲突往往巢龜魚今年玉粒賤如水
青銅欲買囊已虛人生百年如寄爾七十朱顏能有幾
有子休論賢與愚倪生枉却帶經鋤天南看取東坡叟
可是平生廢讀書

李白謫仙詩

我居青空裏君隱黃埃中聲形不相吊心事難形容欲
乘明月光訪君開素懷天杯飲清露展翼登蓬萊佳人
持玉尺度君多少才玉尺不可盡君才無時休對面上
笑語共躡金鰲頭絳宮樓闕百千仞霞衣誰與雲煙浮

御選宋詩卷二十八

欽定四庫全書薈要卷一萬八千三百三十六

集部

御選宋詩卷二十九

七言古詩五

蘇轍

望夫臺

在忠州南
數十里

江上孤峰石為骨望夫不來空獨立去時江水拍山流
去後江移水成磧江移岸改安可知獨與高山化為石
山高身在心不移慰爾行人遠行役

柳湖感物

柳湖萬柳作雲屯種時亂插不須根根如卧蛇身合抱
仰視不見蜩蟬喧花開三月亂飛雪過牆度水無復還
窮高極遠風力盡棄墜泥土顏色昏偶然直墮湖中水
化為浮萍輕且繁隨波上下去無定物性不改天使然
南山老松長百尺根入石底蛟龍蟠秋深葉上露如雨
傾流入土明珠圓乘春發生葉短短根大如指長而堅
神農嘗藥最上品氣力直壓鍾乳溫物生稟受久已異

世俗何始分愚賢

嘗見野人言柳花入水為浮萍松上露隨地為仙茅陰乾服之益人古方

云十斤鍾乳不如一片仙茅

陪歐陽少師永叔燕潁州西湖

西湖草木公所種仁人實使甘棠重歸來築室傍湖東
勝遊還與邦人共公年未老髮先衰對酒清歡似昔時
功成業就了無事令名付與他人知平生著書今絕筆
閉門燕居未嘗出忽來湖上尋舊遊坐令湖水生顏色
酒行樂作遊人多爭觀竊語誰能呵十年思潁今在潁

不飲耐此遊人何

歐陽公所蓄石屏

石中枯木雙扶疎粲然脈理通肌膚剖開左右兩相屬
細看不見毫髮殊老樗剝落但存骨病松憔悴空留鬚
丘陵迤邐山麓近雲煙淡霽風雨餘我驚造物巧如此
刻畫瑣細供人須公家此類尚非一客至不識空嗟吁
案頭紫雲抱明月牀上寒木翻飢烏賦形簡易神自足
鄙棄筆墨嗟勤劬天工此意與人競雜出變怪驚羣愚

世間淺拙無與敵比擬賴有公新書

月石硯屏及石上
寒林樓鳥皆公詩

賦所

和子瞻金山

長江欲盡闊無邊金山當中唯一石潮平風靜日浮海
縹緲樓臺轉金碧瓜洲初見石頭城城下波濤與海平
中流轉柂疑無岸泊舟未定僧先迎山中岑寂恐未足
復將江水遶山麓四無鄰家羣動息鐘聲鏗鏗答山谷
烏鳶力薄隨中路惟有胡鷹石上宿誰知江海多行舟

遊人上下奪巖幽老僧心定身不定送往迎來何時竟
朝遊未厭夜未歸愛山如此如公稀不待遊人盡歸去
恐公未識山中趣

賦黃鶴樓贈李公擇

公擇時
知鄂州

前年見君河之浦東風吹河沙如霧北潭楊柳強知春
樽酒相攜終日語君家東南風氣清謫官河孺不稱情
一麾夏口亦何有高樓黃鶴慰平生荊州洞庭春浪起
漢沔初來入江水岸頭南北不相知惟見風濤湧天地

巫峽瀟湘萬里船中流鼓楫四茫然高城枕山望如帶
華棖照日光流淵樓上騷人多古意坐忘朝市無窮事
誰道武昌岸下魚不如建業城邊水

次韻子瞻題孫莘老墨妙亭

高岸為谷谷為陵一時豪傑空飛騰身隨造化不復返
忽若野雀逢蒼鷹當年碑刻最深固風吹土蝕消無稜
遺文漫滅雨中迹翠石斷裂春後水古墳欲毀野廟廢
行人不去征鞍憑書生耽翫立風雪飢驢厭苦疲奴憎

愛之欲取恨無力旋揉翠墨濡黃繒不知好事孫太守
牛車徙置華堂登遶牆羅列耀珪璧罷燕起讀留賓朋
却思遺迹本安在原隰處處荒榛藤田夫野老誰復顧
鬼火夜照來寒燈廢興聚散一如此反使涕泗沾人膺
寒食贈遊壓沙諸君

城南壓沙古河淤沙上種梨千萬株隆冬十月我獨往
風吹葉盡枝條疎老僧屈指數春候却後百日花當蘇
微風細雨膏潤足枝頭萬萬排明珠齊開競發不知數

照耀冰雪明邨墟此時官閒得遊賞長堤平穩宜驂駒
寺門古木芽葉動倉庾布穀相和呼及時行樂不可緩
歲長春短花須臾僧言我意兩相值欲往屢已脂吾車
今朝寒食煙火斷薄雲蔽日風沙除此花久已待我至
况有朋友相攜扶來邀反覆不能住豈獨負君花已辜
諸君高邁足才思佐酒况得萬玉奴坐中未醉慎無起
倒載當使山公如

次韻子瞻遊道場山何山

兩山相負為峰麓流水重重注溪谷遊人上尋流水源
未覺崎嶇病雙足山深下視雲漫漫徑垂石底千屈盤
松林陰森白日靜忽驚人世如奔湍客行不避苦寒出
僧定端居不下席人生嗟與草木同置身所在由初植
堂中白佛青髻鬢氣象沖淡非人間坐令遠客厭奔走
徑欲築室依空山木魚琅琅夜將旦星斗敲斜挂山半
行役有程未可留將出山門復長歎

送梁交之徐州

湖水清且深新荷半猶卷未見紅妝窈窕娘先排翠羽
參差扇水面風生人未知敬傾俯仰長先見岸上遊人
暮不歸清香入袖涼吹面投壺擊鞠綠楊陰共盡清樽
餐白飯坐中飛將忽先起輕衫出試彭門遠百步洪西
白浪翻戲馬臺南雲岫滿江山雄麗信宜人風流孰似
梁王苑

同李倅鈞訪趙嗣恭留飲南園晚衙先歸

城南高樓出喬木下有方塘秋水足新霜未變草木鮮

晚日旋催梨棗熟，雨荒松菊半榛莽。
風老菰蒲初瑟縮，門前大路多塵土。
日中過客無留轂，開門却埽如有待。
下馬升堂真不速，勸我一振衣。
上黃臨風共倒尊，中淥肴蔬草草意不盡。
絲竹泠泠暗相屬，琳宮仙伯自閒暇。
幕府麤官苦煩促，晚衙簿領當及期。
後堂車轄要須漉，令人更愧東宮師。
眷戀溪山棄華屋。

中秋見月寄子瞻

西風吹暑天益高，明月耿耿分秋毫。
彭城閉門青嶂合。

臥聽百步鳴飛濤使君攜客登燕子月色著人冷如水
筵前不設鼓與鐘處處笛聲相應起浮雲捲盡流金丸
戲馬臺西山鬱蟠杯中淥酒一時盡衣上白露三更寒
扁舟明日浮古汴回首逡巡陵谷變河吞巨野入長淮
城沒黃流只三版明年築城城似山伐木為隄隄更堅
黃樓未成河已退空有遺蹟令人看城頭見月應更好
河流深處今生草子孫幸免魚鼈食歌舞聊寬使君老
南都從事老更貧羞見青天月照人飛鶴投籠不能出

曾是彭城坐中客

次韻張耒見寄

相逢十年驚我老雙鬢蕭蕭似秋草壺漿未洗兩脚泥
南轅已向淮陽道我家初無負郭田茅屋半破蜀江邊
生計長隨五斗米飄搖不定風中煙茹蔬飯糗不願餘
茫茫海內無安居此身長似伏轅馬何日還為縱壑魚
憐君與我同一手微官骭髒羞牛後請看插版趨府門
何似曲肱眠甕牖中流千金買一壺櫝中美玉不須沽

洛陽榷酒味如水百錢一角空滿盃縣前女兒翠欲滴
吏稀人少無晨集到官惟有懶相宜卧看南山春雨濕
陪毛君夜遊北園

池塘草生春尚淺桃李飛花初片片一尊花下夜忘歸
燈火尋春畏春晚春風暗度人不知滿園紅白已離披
江南春雨少晴日露坐青天能幾時折花只恐傷花意
攜客就花花定喜落蕊飄香翠袖中交柯接葉燈光裏
雨練風柔雪不如精神炫轉影扶疎夜看飛燕勝朝日

月暗還須明月珠美人勸我殊非惡明日雨來無此樂
醉歸不用怕山公馬上接羅先倒著

和子瞻鐵拄杖

截竹為杖瘦且輕石堅竹破誤汝行削木為杖輕且好
道遠木折恐不到閩君鐵杖七尺長色如黑蛇氣如霜
提攜但恐汝不力撞堅過險安能傷柳公雖老尚強健
閉門却掃不復將知公足力無險阻憐公未有登山侶
平生四海惟一身袖中長劍為兩人洞庭漫天不覺過

半酣起舞驚鬼神願公此杖亦如此適意遨遊日千里
歸來倚壁示時人海外蒼茫空自記

同王適賦雪

北風吹雨雨不斷遍滿虛空作飛霰紙窗獨卧不成眠
茅屋無聲時一泣烏烏錯莫寒未起庭戶空明夜驚旦
重樓複閣爛生光絕澗連山漫不見夾砌雙杉洗更碧
滿田碧草埋應爛城中閉門無履迹市上孤煙數晨爨
細排玉箸短垂簷暗結輕冰時入硯撥灰有客顧尊俎

迹免何人試鷹犬未容行役埽車轍應有老農歌麥飯
一來江城若俄頃四見白花飛面旋坐看酒甕誰敢嘗
歸踏冰泥屢成濺年來橋板斷不屬莫出肩輿足憂患
到家昏黑空自笑媿婦勤勞每長歎牀頭有酒未用沽
囊裏無錢不勞算更令雪片大如手終勝溪瘴長熏眼
謁告猶能不出門典衣共子成高譙

次韻秦觀秀才攜李公擇書相訪

濟南三歲吾何求使君到後消人憂君言有客輕公侯

扁舟相從古揚州致之匹馬恨無力千里相望同異域
誦詩空使四座驚隱居未易凡人測使君南歸無限情
鴻飛攜書隨我庭此書兼置昔年客袖中秀句淮山清
老夫強顏依府縣堆案文書本非願清談疊疊解人頤
安得坐右長相見狂客吾非賀季真醉吟君似謫仙人
未契長遭少年笑白髮應慚傾蓋新都城酒貴誰當換
塵埃汙面非良算歸來泗上苦思君莫待黃花秋爛漫

秦君與家兄子瞻
約秋後再遊彭城

次韻子瞻贈梁交左藏

彭城欲往臺無檄初喜東西合為一將軍走馬隨春風
精銳千人森尺籍口占佳句驚眾坐手練強兵試鳴鏑
酒酣起舞花滿地醉倒不聽人扶出歸來相對如夢寐
虎踞熊經苦岑寂黃樓方就可同遊飲盡官廚三百石

和子瞻雪浪齋

謫居杜老嘗東屯波濤遶屋知龍尊門前石岸立精鐵
潮汐洗盡莓苔昏野人相望夾水住扁舟時過江西邨

窗中縞練舒眼界枕上雷霆驚耳門不堪水怪妄欺客
欲借楚些時招魂人生出處固難料流萍著水初無根
旌旗旋逐金鼓發蓑笠尚帶風雨痕高齋雪浪卷蒼石
北叟未見疑戲論激泉飛水行亦凍窮邊臘雪如翻盆
一杯徑醉萬事足江城氣味猶應存

孔武仲

與廖開甫自淮南同行赴舉相別五年復相遇
於蘄水縣為詩贈之

東書吾初走夷門傾蓋得君恨不早
蘭溪駐馬復相逢
二紀飛馳如電掃惜君憔悴力不任
顧我滄浪髮先髡
憶昔同行氣頗驕青驄馬快鞍韉好
荒山破屋風豪橫
大澤長堂雪傾倒高談灑落見天機
健句縱橫攄腹藁
辛勤始得到京邑文辭不入春官考
可憐六翮委沙泥
坐看羣仙上蓬島壯年多難寸心折
勁鏃已衰難破縞
而君施設有餘才西佐元戎奪城堡
牛刀拂拭試一懸
如引滄溟灌行潦歸來赴愬天子庭
正欲披腹呈瑰寶

片辭未吐疾先入藜杖扶行色枯槁籃輿復指天涯去
長川橫濫聲浩浩驛驢不日歸王閑那久低摧卧霜草
久長驛書事

空堂深深閃燈燭羣奴鼾眠聲動屋豆肥草軟馬亦便
嚼美只如蠶上簇天事由來不可量初更月出星煌煌
須臾變作霏霏雨客枕不眠知夜長

時雨

空車輾雷幟摧電千里冥冥甘雨遍元豐嘉號卜長年

太一尊神宅畿甸齋宮夜禱回天聽美澤朝流慰人願
豆苗蓬蓬粟低垂土脈舒蘇蝗不飛野老謳歌忘帝力
夕陽相與荷鋤歸

入關山

輕輿兀兀乘朝暉漸入山徑行逶迤昨日喜與山相見
今日得與山相隨山中老翁迎我笑借問久矣來何遲
答云王都富且樂四方車馬皆奔馳我雖踈慵亦勉強
天恩得邑方南歸山林朝市不同調公雖高簡宜無譏

老翁聞語更驩意為我煮水燒松枝山家十錢得升酒
勸我引觴聊沃飢為翁一奏白雪曲翁亦為我歌紫芝
此聲淡泊極有味往往世俗無人知山中之樂有如此
嗟我捨此將焉之

祠二廟之明日未得順風呈同行

岳州西祠從古有控帶洞庭湖之口前對隱顯明滅之
湘山下接齋淪洶湧之長川茫茫白沙連絕嶼淡淡古
木蟠蒼煙昭靈王左安流右翠帳朱幡擁前後鋸牙虎

視森兩廂氣骨生獰欲奔走我來纜舟日已昏袍韉跪
聽祠官言伏興進退如法式四顧詭譎驚心魂平明結
東舟將解叱吸仍聞北風大焚香奏酒殊無計伏渚藏
汀姑有待二王威神世所傳鈴攝鬼怪賓靈仙好風相
送勢不難舒卷造化須臾間波回草動似有意舉櫂開
帆即千里吟詩賞月岳陽樓買魚沽酒巴陵市

炭步港觀螢

九華之南蘆葦長流螢夕起不計雙爛如神仙珠玉闕

青羅掩映千明缸空江沉沉未見月近浦穿林起還滅
魚遊鳥宿自不驚我知此火初無情

泊趙屯

憶昨省覲趨濡川菜衣擁綠方少年艱難險阻俱未歷
孟浪勇決唯爭先舟發趙屯猶未飯有風北起空濛間
掀搖三山欺五岳巨浪倒潑東南天千林向人俱頓仆
兩岸過眼真飛騫帆檣迴戛河漢底鷓首俯飲蛟龍川
跳波濺沫來四面坐中時得鯉與鱸妻啼婢訕殊不顧

兀坐正讀逍遙篇為言方破萬里浪不爾捉月為神仙
江中逢巨石頗突為引牽逡巡水勢亦平緩幸免肝脛
輸烏鳶暮投彭澤宿荒草神驚魄顫何能眠自茲稍悟
垂堂戒鞞紋纔起不敢前矜持太過僅無患往往所至
傷留連乃知老謀與壯事心膽殊異難兼全重來此地
畏洶湧藏舟別浦看漪漣魚跳鷗下自可喜何用蛟鱓
飲流涎斜陽依依照草木夾岸葭蕩鋪書氈兒今弱冠
昔何有昔領無鬚今皓然二十餘年纔瞬息時事幾蛻

如秋蟬區區走俗亦何賴安得尺地巢林泉

瓜步阻風

昨日焚香謁聖母青山鞠躬如負弩但乞天開萬里明
埽去浮雲戢風雨謂宜言發即響報豈知神不聽我語
門前白浪如銀山江上狂風如怒虎船癡櫓硬不能拔
未免棲遲傍州渚輕盈但愛白鷗飛顛頓可憐芳草舞
三江五湖歷已盡勢合平夷反齟齬上水歌呼下水愁
北船縈絆南船去寄言南船莫雄豪萬事低昂如桔槔

我當賣劍買牲牢再埽靈宇陳肩尻黃金壺樽沃香醪
神喜借以南風高揚帆拍手笑爾曹不知流落何江皋
荒洲寂寥聽怒號

賦瑪瑙笛

弟毅父
所藏也

羌兒吹笛作龍吟中有太古之純音伊人已死笛仍在
千古月明江水深誰知巧匠尋山谷感踏溪雲採明玉
雲容芝彩光復黯淺紫輕紅花映肉正聲隱顯初無端
造化推移指法間黃鐘妍美霜朝暖無射淒涼暑月寒

輶車走遍天南北此笛此聲何處得韜之湘竹川錦囊
廣坐聊持銜賓客弘農學士九尺長頰顴山起鬚髯張
從容奏罷陽春曲氣衰坦腹眠繩牀由來雅器自有合
不與教坊管絃雜君不見開元名臣宋侍中手揮羯鼓
疾如風

汴河

磬渠斜與昆河接河遠渠慳幾可涉狂霖一漲高十尋
迅瀉東來比三峽崩騰下與淮泗會清泚亦容伊雒雜

橫空九闕真垂虹怒捲千艘如敗葉祇堪平地看洶湧
何事乘危理舟楫共夫鵝鷺行天上遙與谷中相應答
但憂心手一乖迂巨舶高檣兩摧折而余進退久安命
揭厲以望初不懾妻孥亦已慣江湖笑語猶如泛山陬
鳴弓擊柝警夜盜掘茹撈鰕佐晨饑時登絕徑步榆柳
或面荒陂看鳧鳴我生東南趨向野揮弄清溪看苔雪
枕流漱石真所便履濁凌險終未愜觚稜漸喜金闕近
釜甑何憂米鹽乏渾如海客泛枯槎繚繞明河望閭闔

偶書

暮上高樓聽邨笛清風寥寥吹澤國蒼山莽野百戰地
美木陰林四時色浩蕩乾坤萬里中風光盡屬漁樵客

孔平仲

春天

春天酣酣睡最美日轉花陰猶未起須臾夢覺聞風聲
波濤翻空千萬里出門四望氣慘淡寒色射人如潑水
旋見大雪落交加向晚綏綏尚不止遊絲柳絮復何有

百鳥卷舌愁欲死陰陽變化固有漸乃何暴忽有如此
清江野客心傷悲寂寞無言對桃李

寄王達夫高密令

高城已吹角月暗星河落與子語不休青燈同寂寞平
明車馬去怱怱一飯相邀不得同交情世契兩皆厚東
望白雲千萬重

落花

嶺南冬深花照灼比至春初花已落乘閒攜酒到西園

鳥散蜂歸春寂寞江南此際春如何紅杏海棠開正多
歸期不及春風日猶見池塘著綠荷

太平

溪行曲入四五里乃見州城大如斗人煙疎少白日靜
風物澄明新雨後古來豪俊多在此悵望千秋一回首
謝家青山空自高李白扁舟復何有

送客到江亭

春江碧波渺天去兩岸紅桃落如雨主人到此送行人

落日留連會歌舞渡頭楊柳正依依拂水搖風千萬絲
看看亦整東歸棹誰折長條贈我歸

寄鄒蹇叔

西園春深百草長殘花紛紛綠葉光蜂歸蝶散情已薄
獨我遶樹行如狂亟令沽酒藉地飲卧嗅落蕊傾金觴
醉來意氣頗脫略睥睨天地如毫芒狂歌大笑誰對值
山猿谷鳥啼斜陽却思高陽舊徒侶安得飛至坐我傍
登城引望不可見雲峰古木徒蒼蒼

米芾

閶門舟中戲作呈伯原

蘋風忽起吹舟悍
雨打圖書藏裏亂
閶門咫尺不安流
星宿浮槎寄江漢
吳王故苑古長洲
潮汐池邊一佇留
秀蕙芳蘭無處所
荒莞叢葦滿清流

賀鑄

留別田晝

田字承君始名至明字君義元豐初涇陽同官也

君家陋巷一尺泥
吾車有輪馬有蹄
犯寒踏雨重相過

明日扁舟吾遂西
回首邯鄲迹如埽
離索十年成潦倒
免葵燕麥春自妍
蟬腹龜腸氣方飽
雲達杳杳謝攀躋
長缺與人還故棲
異時結駟東南畝
耕者老夫鋤者妻
送僧雲還吳興

吳興道人美風度
月下滄浪翹白鷺
晝公詩律尚能傳
間有赤烏黃耳句
海角相逢一笑新
懷歸不待白蘋春
寄聲故國羣兒輩
潦倒塵埃賀季真

答許景亮

許永嘉人字少明力學喜為詩惠然出長篇見投况我以鄧高密謝太傅

即賦以答時余將為江夏之行
兼與之別乙亥九月京師賦

東嘉海上孕瓌怪之子人英晦當代發之辭章聊一噫
雷鼓霜鐘警聒聒投吾夜光敢不拜相期過高幸少殺
君家風鑒嚴簡汰顧我衰遲積疴瘵久隱牆東慕牛僧
絕望仲華安石輩老矣狂奴猶故態清思屢遭俗子敗
絮衣棘徑動胃礙京塵浼人更難奈行拏一舟犯滂拜
五斗無餘雜糠稗全家飫餐雲夢豈黃鶴樓登指天外
燕子西飛書可待訪我少明安好在

張舜民

縱步湘西

今朝不易得天晴
閒過江西取意行
忽然林外見山色
又向橋邊聞水聲
綠竹長松間桃李
天然翠幙圍羅綺
日暮歸舟醉不知
晚風吹過湘江水

陳襄

通判國博命賦假山

去年水潦百穀死
居民無食食糟粃
州之餓者數千人

黃巖之民尤倍屣攜持老少出城郭盡撤牆屋無居止
鬻妻棄子人不售價例不復論羊豕白日市井聞號呼
夜堆廊廡如蟲豸縣官哀憐發賑救一飯纔得一盂爾
出門未暇充喉咽已有數十填溝水我時過之不忍顧
往往悲咽胸填委豈無智慮裨萬一遠地不得號君耳
錢侯作倅忠且仁悲憐餓殍如親子日開官廩與之食
又令豪右發儲峙昨日馳書白轉運披陳肝腎獻金矢
更乞兵儲二萬斛民之大命方有倚侯從新年作假山

自聞民飢不得視非無泉石可盤樂人今方瘁何能喜
願侯勿遽愛此山念此媿臘存孤蟻天無疫癘五穀熟
生者保聚歸田里此山之石堅不堅將與侯德無窮已
郭祥正

憶敬亭山

忽憶敬亭山翠碧千萬尋白雲拂地弄晴影黃猿嘯晚
清人心桃花流水三月深柳絮披煙辭故林重樓複殿
踞山脚塑像制度祠非淫晉時謝守曾賽雨至今石上

鐫遺吟五言雅重參二典琅琅一誦鏗
璆琳綠潭無底
白玉沉千載何人知此音李白騎鯨出
滄海回鞭曾宿
峒嶺岑却泛虛舟弄溪月紫霞之杯傾不
歇醉來更約
崔宗之秋水玄談清興發數公逸駕何當
還悵望英風
不可攀信道相看兩不厭古來只有敬亭
山

楊甲

寒食後遊學射山

疾風吹沙天茫茫
日落未落原野黃
山空無人石碌碌

路長馬飢石齧足荒臺古林翳雲族何人剗巖縛層屋
當年萬騎填山谷至今拾寶多遺鏃故國山川愁遠目
人世悲歡風雨速凌高舉酒天為感手攀巖樹叩雲木
何人唱我淒涼曲興亡一眼冥冥綠野水平蕪飛雁驚

庚寅再遊梅龍

霜郊馬頭鞭影西欲尋遠梅無舊蹊但聞草木皆有香
未到已識花前溪艤舟登岸入梅處竹樹煙火茅茨低
百年死樹蟲蘚暗鱗甲漠漠僵橫寬老翁鼻祖頭雪白

下見兒女方勝筭數株無力已仆地強起放春花滿畦
瘦龍夭矯欲仙去脊尾一半埋沙泥雷公幾時獵幽螫
夜半刀斧來剗剗野人往往多再拜疑有鬼物憑其棲
問樵訪牧不知歲髻鬣已見今耄倪故人同遊六七輩
或似醉阮林中嵇遠樹覓花不識路東邊犬吠西號雞
榼中但有酒清濁寒具野擔勤提攜誰言猶是蜀梅苑
破丘斷隴山蒿藜種花滿地作癡計隨手變化空塵壑
只餘老樹香不滅力戰風雨猶堅屛何時江邨一曲路

與子共賦歸來兮

郊僑

簡公約素琴堂

素琴之堂虛且清素琴之韻淪杳冥神閒意定默自鳴
宮商不動誰與聽堂中道人骨不俗貌龐形端顏瑩玉
我嘗見之醒心目寧必絳桐絃斷續嗚呼靖節已死不
復聞成虧相半疑昭文阮手鍾耳相吐吞素琴之道詎
可論道人道人聽我語紛紛世俗誰師古金徽玉軫方

步武虛堂榜名無自苦

黃庭堅

次韻子瞻題郭熙畫秋山

黃州逐客未賜環
江南江北飽看山
玉堂卧對郭熙畫
發興已在青林間
郭熙官畫但荒遠
短紙曲折開秋晚
江邨煙外雨脚明
歸雁行邊餘疊巘
坐思黃甘洞庭霜
恨身不如雁隨陽
熙今頭白有眼力
尚能弄筆映窗光
畫取江南好風日
慰此將老鏡中髮
但熙肯畫寬作程

五日十日一水石

戲和文潛謝穆父松扇

猩毛束筆魚網紙松柎織扇清相似
動搖懷袖風雨來想見僧前落松子
張侯哦詩松韻寒六月火雲蒸肉山
持贈小君聊一笑不須射雉穀黃間

雙井茶送子瞻

人間風月不到處天上玉堂森寶書
想見東坡舊居士揮毫百斛瀉明珠
我家江南摘雲腴落磴霏霏雪不如

為公喚起黃州夢獨載扁舟向五湖

以雙井茶送孔常父

校經同省並門居無日不聞公讀書故持茗椀澆舌本
要聽六經如貫珠心知韻勝舌知腴何似寶雲與真如
湯餅作魔應午寢慰公渴夢吞江湖

常父答詩有煎點徑須煩綠珠之句復次韻戲
答

小鬟雖醜巧妝梳埽地如鏡能檢書欲買娉婷供煮茗

我無一斛明月珠知公家亦闕埽除但有文君對相如
政當為公乞如願作牋遠寄宮亭湖

水仙花

凌波仙子生塵襪水上輕盈步微月是誰招此斷腸魂
種作寒花寄愁絕含香體素欲傾城山礬是弟梅是兄
坐對真成被花惱出門一笑大江橫

武昌松風閣

依山築閣見平川夜闌箕斗插屋椽我來名之意適然

老松魁梧數百年斧斤所赦今參天風鳴媧皇五十絃
洗耳不須菩薩泉嘉二三子甚好賢力貧買酒醉此筵
夜雨鳴廊到曉懸相看不歸卧僧羶泉枯石燥復潺湲
山川光輝為我妍野僧早飢不能饘曉見寒谿有炊煙
東坡道人已沉泉張侯何時到眼前釣臺驚濤可晝眠
怡亭看篆蛟龍纏安得此身脫拘攣舟載諸友長周旋

彫陂

彫陂之水清且泚屈為印文三百里呼船載過七十餘

褰裳亂流初不記竹輿嘔啞山徑涼鷓鴣呼婦聲相倚
篁中猶道泥滑滑僕夫慘慘耕夫喜窮山為吏如漫郎
安能為人作嚆矢老僧迎謁喜我來吾以王事篤行李
知民虛實應縣官吾寧信目不信耳僧言生長八十餘
縣令未曾身到此

謝景文惠浩然所作廷珪墨

廷珪質墨出蘇家麝煤添澤紋烏鞞柳枝瘦龍印香字
十襲一日三摩挲劉侯愛我如桃李揮贈要我書萬紙

不意神禹治水圭忽然入吾懷袖裏吾不能手抄五車
書亦不能寫論付官奴便當閉門學水墨灑作江南驟
雨圖

題落星寺

落星開士深結屋龍閣老翁來賦詩

寺僧擇隆作宴坐
小軒為落星之勝

小雨藏山客坐久長江接天帆到遲晏寢清香與世隔
畫圖妙絕無人知蜂房各自開戶牖處處煮茶藤一枝

以右軍書數種贈丘十四

丘郎氣如春景晴風暄百果草木生眼如霜鷓齒玉冰
擁書環坐愛窗明松花汎硯摹真行字身藏穎秀勁清
問誰學之果蘭亭我昔頗復戲墨卿銀鈎蠶尾爛箱籬
贈君鋪案黏曲屏小字莫作癡凍蠅樂毅論勝遺教經
大字無過瘞鶴銘官奴作草欺伯英隨人作計終後人
自成一家始逼真卿家小女名阿潛看目如翁有精神
試留此書他日學往往不減衛夫人

次韻子瞻春菜

北方春蔬嚼冰雪妍暖思採南山蕨韭苗水餅姑置之
苦菜黃雞羹糝滑蓴絲色紫菰首白蕒蒿牙甜焯頭辣
生菹入湯翻手成芼以薑橙誇縷抹驚雷菌子出萬釘
白鷺截掌鼈解甲琅玕林深未飄籜軟炊香杭煨短茁
萬錢自是宰相事一飯且從吾黨說公如端為苦筍歸
明日青衫誠可脫

長句謝陳適用惠送吳南雄所贈紙

廬陵政事無金牛恐是漢時陳太丘書記姓名不肯學

得紙無異夏得裘琢詩包紙送贈我自狀明月非暗投
詩句縱橫剪宮錦惜無阿買書銀鈎蠻溪切藤卷盈百
側釐羞滑繭羞白想當鳴杵砧面平枕榔葉風溪水碧
千里鷺毛意不輕瘴衣腥膩北歸客君侯謙虛不自供
胡不贈世文章伯一泮之水容牛蹄識字有數我自知
小時雙鈎學楷法至今兒子憎家雞雖然嘉惠敢虛辱
煮泥續尾成大軸寫心與君心莫傳平生落魄不問天
樽前花底幸好戲為君絕筆謝風煙已無商頌猗那手

請續南華內外篇

奉送周元翁鎖吉州司法廳赴禮部試

江南江北木葉黃五湖歸雁天
雨霜繫船湓城秣高馬
客丁結束女縫裳貢書登名徹
未央不比長卿薄遊梁
南山霧豹出文章去取公卿易
驅羊與君初無一日雅
傾蓋許子如班揚囚拘官曹少
相見忽忽歲晚稼滌場
一杯僚友喜多在謝守不見空
澄江澄江如練明橘柚
萬峰相依摩青蒼暮堂醺醺客
被酒豔歌聒醉燭生光

椎鼓發船星斗白明日各在天一方寒鴉滿枝二喬宅
樽前顧曲憶周郎鱸魚斫膾蔗為漿恨君不留誰與嘗
殿前春風君射策漢庭諸公必動色故人若問黃初平
將作金華牧羊客

送王郎

酌君以蒲城桑落之酒泛君以湘纍秋菊之英贈君以
黔川點漆之墨送君以陽關隋淚之聲酒澆胸中之磊
砢菊制短世之顏齡墨以傳千古文章之印歌以寫從

來兄弟之情江山千里俱頭白骨肉十年終眼青連牀
夜語雞戒曉書囊無底談未了有功翰墨乃如此何恨
遠別音書少炊沙作糜終不飽鏤冰文字費工巧要須
心地收汗馬孔孟行世日杲杲有弟有弟力持家婦能
養姑供珍鮭兒大詩書女絲麻公但讀書煮春茶

題孟浩然畫像

先生少也隱鹿門爽氣洗盡塵埃昏賦詩真可凌鮑謝
短褐豈愧公卿尊故人私邀伴禁直誦詩不顧龍鱗逆

風雲感會雖有時顧此定知無枉尺襄江渺渺汎清流
梅殘臘月年年愁先生一往經幾秋後來誰復釣槎頭

秦觀

和王通叟琵琶夢

鶗鴂鳴時衆芳歇華堂夢斷音容絕風驚玉露不成圓
一夜芙蓉泣秋月金紋捍面紫檀槽曾抱花前送酒舫
庾郎江令費珠璧小砑紅箋揮兔毫風流雲散令人瘦
忍看麴塵昏錦綬楚水悠悠更不西上天破鑑空依舊

和黃法曹憶建溪梅花同參寥賦

海陵參軍不枯槁醉憶梅花愁絕倒為憐一樹傍寒溪
花水多情自相惱清淚斑斑知有恨恨春相逢苦不早
甘心結子待君來洗雨梳風為誰好誰云廣平心似鐵
不惜珠璣與揮埽月沒參橫畫角哀暗香消盡令人老
天分四時不相貸孤芳轉盼同衰草要須健步遠移歸
亂插繁華向晴昊

徐得之閒軒

建安自古多俊髦徐子磊落尤其豪論兵說劍走湖海
身勤事左無所遭綠水五校已屠膾黑衣三衛嗟徒勞
歸來故山便卜菴脫棄萬事輕鴻毛橫前澗水漱哀玉
傍舍老櫪藏飛猱山蔬何用媿梁肉鶴氅未必輸青袍
追寒弄月有真意慎勿輕語傳兒曹

晁補之

同張子望顏伯儀上關納涼

高閣無風華屋熱正午四鄰還往絕張侯不厭過市煩

呼我柳隄鳴躩蹠城如蚪背卧透迤城上戍樓虬白鬢
一水貫來深宛轉萬家圍去綠參差囂塵塞眼那能避
未暇解衣聊埽地可憐繫馬著垂楊可憐臺榭對池塘
無限芳洲生杜若芙蓉菡萏倚新妝鴛鴦相對鷓鴣舞
飛去黃鸝獨無語登槃未用伐蛟鼉苦菜黃瓜亦堪數
張侯河目須垂膺齒如明玉嚼寒冰未須坐上白羽扇
談言自足驅青蠅司業高情勿寂寞仲宣從軍良可樂
欲看詩句出嵌空更饒酒量開磅礴廣文顛顛獨何人

男兒三十四方身相逢得意吐然諾俸二百錢終不貧

野橋傴僂風吹髮徙倚門關臨峭嶽江湖平日憶蘇侯

更詠夕陽明觀闕

蘇子由上闕詩云落日回看觀闕明

人語喧喧未聽回

木蘭晚放水萍開黃昏下馬天似漆急雨傾屋翻狂雷

試院求李唐臣畫

有客攜來白團扇看君畫出翠微峰忽然陂水變陰霧
便有松林吹晚風松林陂水靜何極何處歸舟天際識
韋侯直榦僮不難杜陵東絹那能惜

酬李唐臣贈山水短軸

李為刑曹杜君章知賞

大山宮小山霍欲識山高觀石脚大波為瀾小波為淪
欲知水深觀水津營丘於此意獨親杜侯所與復有人
不見李侯今五載苦向營丘有餘態齊紈如雪吳刀裁
小毫束筍縑囊開經營初似雲煙合揮灑忽如風雨來
蒼梧泱泱天無日深巖老樹洪濤入榛林閤漠猿狖寒
苔蘚侵淫螺蚌濕紛紛禽散江干沙有風北來吹蒹葭
前洲後渚相隨沒行子漁人歸徑失李侯此筆良已竒

我聞李侯家朔垂跨河而北寧有之曷不南遊觀禹穴
梅梁鑱澀萍滿皮神物變化當若斯元君畫史雖天與
我論絕藝無今古張顛草書要劍舞得意可無山水助
他日李侯人益慕

贈麻田山人吳子野

余見待制李公誠之於汶
上蘇密州在焉始聞子野

名

汶陽我昔見蘇李人言吳子歸未幾長嘯春風大澤西
却望麻田山萬里不逢鄭老溪上箭欲致朱公路傍米

今年窮巷絲生髮馬尾吹風化衣袷定知赤鯉薦波濤
何意黃冠驚僕妾琅函萬過陰魄悲心無丹白鑪生兒
山中種芝豈無侶成都醉眠未當去願從王烈或見呼
試訪孫登竟無語棄家內愧非此流此身天地一虛舟
未應齒豁塵埃裏乞與青精救白頭

喜文潛自淮南歸招飲西崗呈坐客

春回三楚冰生漪銀臺春夢歸心馳莫言上水百丈苦
淮渚東風一月期都城經春雪蔽地百花不放須君至

清晨一紙國門書走馬蓬壺下直初保康橋頭燈照夜
我馬鳴嘶向君馬得君豈但官局同卜鄰况近南城下
文詞翊善知名久丈人令德于公後同年廖李芸省郎
吳門隱尉身姓張平時花發值此客隨分東牆有春色
宮壺酒賜玉流卮請君但作留春詩人生身外安所知
為君借舞杜廷尉對花有酒那不醉

晁說之

涪州寄蒲舜美桐煙墨來試之良佳因成長句

西風吹林秋日白修桐葉彫實寒碧霜餘結實鳳不至
野人取之出膏液山中老翁頗喜事買膏燈光歸照室
旋收輕煤下玉杵陰房掩翳煙不出澤麋解角麝薦香
嚴冬折膠天與力律灰吹盡無裂文外乾中堅介如石
故人憐我貧嗜書遺我一丸欣有得空堂無風塵亦靜
朝陽壓窗書繞壁起臨墨池洗硯試入手已怪光奪漆
蒼茫忽驚玄雲晦菴靄頓失寒松色徐嗟流落用失所
翰墨何由有勲績從軍豪氣吾豈能倚馬翩翩磨楯墨

傍人笑言君莫疑著書固屬窮愁客

尉解無隙地不能蒔花竹之屬惟廳之前舊有
柳一株予憐其獨也增植其七焉暮春之月大
有生意可喜為賦此

千林春入花梢紅空庭無樹來東風手栽楊柳三尺許
芳意已在萌芽中官居難期十年木聊爾移根伴幽獨
雨催細葉相續生看峰為誰出修綠君不見美人夢中
春日長翠簾風開捲春光飢寒病叟寧有此蒼苔破封

對作行游絲飛空日停午乳燕巢成寂無語柔條作陰
未覆庭影立東風不能舞明年我亦未成歸會見裊裊
生新枝清陰漸滿搖落日度曲無力弓彎垂人生于世
無定著身與楊花共飄泊他時莫忘桓將軍漢南重來
看搖落

晝寢

官曹無人吏休沐杜門謝客車脫軸門前經旬客不至
苔色侵堦春更綠書堂蕭然白日靜黃蜂收聲蜜房足

金方口本全書
卷二十一
楊花浩蕩天無風簷端三尺朝陽紅晴薰病眼煖欲醉
卧搔短髮如飛蓬枕書睡熟呼不醒黃粱正飯邯鄲翁
不知紛紛夢幾許覺來煙際聞昏鐘

樂温舟中作

密雲捲雨歸空山暮林接翅昏鴉還須臾水面明月出
滄江萬頃琉璃寒波平汗漫天無風水光月色相為容
臨流愛此無盡碧乘月直下滄浪中江心石出高崔嵬
水作鏡面無停埃琉璃萬頃忽破碎知是一葦橫江來

中流與月更媚嫵湛湛無聲翠光舞飄然長嘯順流下
權夫請留恐仙去姑令結纜寒沙邊月方正中光入船
洗杯索酒屬明月今夕之樂寧非天

今秋久雨至八月望夕始晴月色尤清澈可愛
置酒月下作

玉斧琢月玻璃聲月中桂樹秋風驚終年待此一輪滿
不憂蛙食憂鼃鳴白鼃十日鳴空山雨師乘雲呼不還
黃塵曉漲三尺潦明河夜飛千丈瀾廣寒不復觀霓裳

公子豈解歌秋陽金星未滅月已出風櫺雨隙棲清光
須臾紺繒展秋碧仰見西山銜半壁青天冥冥星益踈
光芒寒溢千山白今夕何夕誰與度舉杯屬月當起舞
陶然相對影凌亂不覺驚烏起庭樹樹頭霏霏木葉墜
白露懸空斗垂地雖無絲竹為陶寫亦有鳴蛙當鼓吹
向來悲歌子桑子飢坐虛憂禾生耳安知上帝思澄清
要令六合無泥滓

晁沖之

東陽山人僻居

我家京洛間，桂玉資薄產。平生丘壑心，水竹不滿眼。清
晨有客吳中來，山川指授收竒才。笑談長揖波浪下，懷
抱遠承巖穴開。東陽山人高華隱，豪俠持身復修謹。旁
山多闢黍稷田，碧溪東流汲春醞。溪南一畝當翠微，秋
風萼熟菰葉肥。龜魚上帶藻荇動，鷗鷺下拂芙蓉飛。亭
陰野塘亦新築，溪山共作窗中綠。諸郎年少皆知書，子
夜哦詩動修竹。歲時冠蓋如浮雲，擊鐘鼎食江淮聞。愛

山自比謝康樂好士不減春申君我欲沿溪揚小楫亭
邊共醉藤蘿月叩門夜訪君家時扁舟重載山陰雪

簡江子之求茶

政和密雲不作團小夸寸許蒼龍蟠金花絳囊如截玉
綠面彷彿松溪寒人間此品那可得三年聞有終未識
老夫於此百不忙飽食但苦夏日長北窗無風睡不解
齒頰苦澀思清涼故人新除協律郎交遊多在白玉堂
揀牙鬪夸皆飫嘗幸為傳聲李太府煩渠折簡買頭綱

謝沈次律水枕

沈侯筆力鼎可扛左手截取吳淞江折流來此一尺枕
指麾巨鰐回濤瀧平生性不好長物舉以遺我嗟無雙
呼兒快取斬笛葦埽除塵榻移當窗隨眠置我丘壑裏
始信孫郎真枕水我生不出長安城四十二年塵沈耳
領君此枕何瀟然睡起醒心如一洗


御
選
宋
詩
卷
二
十
九

謹案卷二十八第一頁後二行久拋菘葛猶細事
刊本菘作松據東坡集改

卷二十九第二十七頁前四行題落星寺刊本寺
訛亭據山谷集改

第三十四頁前三行成都醉眠未當去刊本眠訛
眼據晁補之雞肋集改





總校官庶吉士臣侍朝

校對官檢討臣蕭九成

騰錄舉人臣李駟